

■ RUMANTSCHS EN LA DIASPORA

Il Chor Rumantsch Zug (CRZ) ha in vast program 2019

Las duas tractandas principalas dalla radunonza generala dil Chor Rumantsch Zug (CRZ) dils 21 da schaner 2019 eran la retrospectiva sin il cumpleinamein reussiu concert il zercladur 2018 ed il niev program d'activitads 2019. Cun gronda luschezia e satisfaziun havein nus mirau anavos sin la gronda impressiun che nies concert ensemen cul Chor Maschadà Grischun Turitg ha fatg sigl auditori. Quei concert ei staus ina fetg buna e respectabla reclama per il cant romantsch en la Bassa. Plinavon ston ins era menziunar ils ulteriurs effects e la durabladad da quell'occorrenza. Dils 12 cantadurs ad hoc ein nov sedecidi d'entrar definitiv el CRZ. E muort il stedi engaschament da nies premurau president, *Corsin Derungs*, ei schizun il quen final dil concert curdaus ora favoreivel. El center dil program d'activitads 2019 stat la participaziun dil CRZ alla Fiasta da cant dalla Svizra centrala dils

14–16 da zercladur 2019 a Hitzkirch. Da present vegnan las duas canzuns da pag exercitadas pruamein e muladas fin per la presentaziun avon ils experts. Il CRZ vul far buna tschera a quella fiasta e representar dignamein la viarva romontscha. Nus sperein secapescha che quei reusseschi al CRZ cun ses 34 flots cantadurs! Enramaus e cumpletaus vegn il program 2019 plinavon cun tschun ulteriuras produzioni da cant, cun ina spassegiada d'in di e pliras occorrenzas pli pintgas. Cun gronda acclamaziun ha il CRZ numnau *Pius Cavelti* e *Gregor Baselgia* sco commembers d'honor. Omisdus commembers ein stai biars onns en suprastonza ed han prestau leu biara e buna lavur. Ed era sper lur ufeci eran els adina prompts da segidar nua ch'ei fageva basegns.

Informaziuns anfla era sut:
www.chorrumantschzug.ch

Robert Hitz